

PAULO ENA URIURI HELABUINA TESALONIA ENADI

1 ¹Ai Paulo, eo Silevano, eo Timoteo, ai uriuri Tesalonia edi ekalesia aridi eai, Eaubada ita Tamada boeana eai, eo Guiiau Iesu Keriso boeana eai:

²Ainauia omi arimiu eai, eo loni, Eaubada ita Tamada, eo Guiiau Iesu Keriso aridi eai se laowa.

³Ema tataoyao e, huia gamagamagari nuamai se adidiri Eaubada ai lautoiei omi debamiu eai, meta hinage i lolo, paana ede emi sunuma i tadada lailai, omi gamagarimiu esau eo esau, emi haigadosisi hinage i tadada. ⁴Ai mo ema nuatu omi debamiu eai Eaubada ena ekalesia ai ribapasipasiedi, paana baaea eo nuadubu gamagamagari au hearodi wa, emi nuapaipai eo emi sunuma se ita.

⁵Eaubada ena hekiraino dudurai heiheinoina ede meta arinai ie masaraha, omi abo si ene au lolo Eaubada ena basileia abo au abi, ia wa debana eai hinage amamna ta au hearodi. ⁶Eaubada ena nuatu i ene laulau dudurai ede tauhebaaeamiu isi abo baaea se hearo, maisana. ⁷Omi hinage baaea wa au hearo wa maemai abo se heiyawasimiu, huiana ne Guiiau Iesu Keriso se hemasarahayama, galewa eai i laoma, maena aneru gigigiboridi hinage. ⁸Eo oeagi balebalelemnai eai, isi Eaubada nige abina se ata abo i hemaisadi, eo isi hinage eda Guiiau Iesu Keriso ena evanelia nige se awaabiei. ⁹Edi maisa ede isi abo se sabom ariariri nige nosina, Guiiau matana eo ena gigibori namanamarina eai se lausuara. ¹⁰Nei asubenana eai ne ia abo i laoma ena hetabu tataodi boeadi eai ia abo se henamanamari, tauataataiena gamagamagari ia abo se nooei (paana ema riba arimiu eai se ataieyao). ¹¹Arinai hinage huia gamagamagari ai lau-uura enamiu, eda Eaubada i eogahaimiu wa ai ene bena abo i ene au lolo, eo ena nualolo gamagamagari, ena laulau lolo aridi eai, abo i hemamohoiei, sunuma abiabina ma gigiborina abo i hemamohoiei

hinage. ¹²Eda Guiiau Iesu Keriso esana abo se hedebasaei omi boeamiu eai, eo omi hinage ia boeana eai abo se hedebaseamiu, eda Eaubada eo Guiiau Iesu Keriso ena ainauia debana eai.

Guiiau ena asubena, eo Baaea Tauna.

2 ¹Na ema tataoyao e, ai awanorilaowa arimiu eai, eda Guiiau Iesu Keriso arinai ena laoma debana eai, eo eda oigogoesega ia arinai debana eai. ²Omi nuamiu tabu se moimoiu heuheula, eo tabu au nuadubu earua, e riba, e uriuri doha si ene ai enamai, debadi eai, abo au ene Guiiau ena asubena i hanahanauririmao. ³Tabu tau esau i boraimiu, paana nei asubenana ne taba nige i laoma sora se uiuio baguna, eo nei tau baaeana ne hinage abo i taumasaraha, ia ede mate natuna. ⁴Ginauri gamagamagari Eaubada esana se torelaedi eo se aiiahelahui ia i guduguidui eo i ribatausaeuioi hinage; arinai ia doha Eaubada i babawa mo Eaubada ena dubu eai, i awa-Eaubadauioi. ⁵Au henuaisini e nige'e, eau maemiu ta mimia wa, teina ginauridi ta ea heribamio? ⁶Au nuatuiyao saha ede tau ta i nuanuahi i lau e ena huia i masaraha. ⁷Laulau baaea i laulauyamuyamuidi ie paisoa hetubuyao; na tauguduguduina abo i gudugudui i lau e ia abo se laeudoiei; ⁸abotai abo Tau Baaea wa se hemasarahayama Guiiau ia abo i healagorugoru ia awana earuana eai, eo ena laoma namanamarina eai arinai abo i hebaeaeahi. ⁹Ia ede ia ena laoma Satani ena paisoa arinai, eo ma gigibori gamagamagari, eo heiheinoidi eo noonoo boraboradi, ¹⁰eo laulau baaea ena borabora gamagamagari isi taumatemate boeadi eai; paana isi riba mamohoina gadosisina nige se abi, ata se mauri. ¹¹Paana ede teina Eaubada nuatu borabora abo i mosei aridi eai riba borabora bena se ataiei. ¹²Isi gamagaridi riba mamohoina nige se ataiei abo se baaea dumaduma, isi laulau baaea wa se kodei.

Lauhasahasa ribadi.

¹³Ema tataoyao e, Guiiau i gadosisiemiu wa, ai nuamai esega mo, huia gamagamagari Eaubada ai lautoiei omi debamiu eai, paana huia bagubaguna eai Eaubada i ribahinehinerimio abihemauri arinai, Earua ena hetabu hinage debana eai, eo riba mamohoina wa abanuatuina. ¹⁴Aridi eai wa eda evelia debana eai i eogahaimiu, eda Guiiau Iesu Keriso ena namanamari abo au abi. ¹⁵Ema tataoyao e, arinai au torotahitahinei, riba wa se heatamiu wa, awamai ribadi e ema uriuri ai uridiwa, au sogohidi.

¹⁶Na Guiiau Iesu Keriso iabom, eo Eaubada, ita Tamada, ia i gadosisieda, eo i henuabigada, i lau e nige nosina, eo ainauia debana eai, sunuma lolo i ledima hinage, ¹⁷ia nuamiu i hetarudi, eo riba lolodi eo paisoa lolodi gamagamagari aridi eai abo i heteroadidiriesegaimiu.

3 ¹Ema tataoyao e, ai ribalautom ede ina: au lau-uura enamai, Guiiau ena riba bena abo i hetadada heula, ma aniona, doha hinage boeamiu eai. ²Ai, tatao eayuauredi eo tatao laulau baeadi nimadi eai bena abo se abihemaurimai; paana ede tatao gamagaridi edi sunuma nige'e. ³Na, Guiiau mo i lolo, ia abo i henuapaipaimiu eo Tau Baeae arinai abo i abihemaurimiu. ⁴Debamiu eai Guiiau ai nuatuaaddiriei, ginauri wa ai lauhesommiu wa au abiabiwataidi, abotai abo au abiwataidi hinage. ⁵Guiiau nuamiu abo i woelaedi Eaubada ena gadosisi boeana eai, eo Keriso au bagiwatai ma nuapaipaimiu hinage.

⁶Na ema tataoyao e, eda Guiiau Iesu Keriso esana eai ai lauhesommiu, eda tataoyao ena esau i laulau gaibu mo, eo riba wa arimai eai i ataiei wa nige i abiwatai, ia au lausuaraei, i otawa. ⁷Paana ede omi au itayao taba au lauwataimai: ai ema laulau boeamiu eai ai miamia nige ai laulau gaibu mo, ⁸eo nige tau esau ana ai ai ai ai ai gaibu, na paisoa ai paipaisoa dumaduma ma amamnamai, maiona ai paisoa eo asubena ai paisoa, ata ami ai abi arinai abo ai hedehamiu. ⁹Tabu nuamiu au ene ema dobila nige'e, na iilamai mo bena abo au lauwatai. ¹⁰Paana ai maemiu ta miamia, teina ai lauhesommiu ta, ai ene ena tau esau nige i paisoa, hinage tabu i ai ai. ¹¹Na ai ataieyao headi boeamiu eai se laulau gaibu mo, nige se paipaisoa, isi manamanatatahai tataodi. ¹²Na isi nei doha ai lauhesomdi eo ai henuapaipaidi eda Guiiau Iesu debana eai, isi abo se paisoa tautaubiga, eo isibom adi ai ai abo se ai ai. ¹³Na omi, ema tataoyao e, laulau lolodi eai tabu amnamiu se tomatoma.

¹⁴Ema riba ta, teina uriuri eai ta ena tau esau nige i awaabiei meta tau me au itasipoi, eo ia tabu au awaehaei, bena abo i taumaeamaea. ¹⁵Taiede ia tabu au hewaiunuei, na au hedudurai mo doha ia eda tau esau.

¹⁶Na, loni ena Guiiau iabom loni i leawa huia gamagamagari, eo dobila gamagamagari eai, Guiiau abo gamagarimiu maemiu.

¹⁷Eau Paulo, egu lautoi ede ina eaubom nimagu eai, uriuri gamagamagari ia ede heiheinoina: eau egu uriuri ede meta. ¹⁸Eda Guiiau Iesu Keriso ena ainauia omi gamagarimiu maemiu. Amen.^a

a 3.18 Leta helabuina ta Atenai eai hinage se uri.